

LA FARCE DE MAITRE PTHELIN

TEXTE¹

¹ Nous reproduisons ici le texte de l'édition établie par F.-E. Schneegans, *Maître Pierre Pathelin*, farce du XV^e siècle, Strasbourg, Heitz (Bibliotheca romanica. Bibliothèque française, 60-61), 1908. Au titre des dernières éditions du texte, nous devons mentionner notamment : *Recueil de farces, 1450-1550*, (éd.) A. Tissier, Genève, Droz, t. 7, 1993 ; *La farce de Maître Pathelin*, (éd. et trad. fr.) M. Rousse, Paris, Gallimard (Folio), 1999.

MAISTRE PIERRE

commence.

Sainete Marie, Guillemette,
Pour quelque paine que je mette
A cabasser n'a ramasser,
Nous ne povons rien amasser.
5. Or vy je que j'avocassoye.

GUILLEMETTE

Par Nostre Dam, je y pensoye,
Dont on chante en avocssaige :
Mais on ne vous tient pas si saige,
Des quatre pars, comme on souloit.
10. Je vy que chascun vous vouloit
Avoir pour gangner sa querelle :
Maintenant chascun vous appella
Par tout: advocat dessoubz l'orme.

PATHELIN

Encor ne le di je pas pour me
15. Vanter, mais n'a au territoire,
Où nous tenons nostre auditoire,
Homme plus saige, fors le maire.

GUILLEMETTE

Aussi a il leu le grimaire
Et aprins à clerc longue piece.

PATHELIN

20. A qui veez vous que ne despeche
Sa cause, se je m'y vueil mettre,
Et si. n'aprins oncques a lettre
Que ung peu, mais je m'ose vanter
Que je say aussi bien chanter
25. Ou livre avecques nostre prestre
Que se j'eusse esté a maistre

Autant que Charles en Espagne.

GUILLEMETTE

Que nous vault cecy ? Pas enpaigne.
Nous mourons de fine famine.
30. Noz robbes sont plus qu'estamine
Reses et ne povons savoir
Comment nous en peussions avoir.
Et que nous vault vostre science ?

PATHELIN

Taisiez vous ! Par ma conscience,
35. Se je vueil mon sens esprouver,
Je sçauray bien ou en trouver,
Des robbes et des chapperons !
Se Dieu plaist, nous eschaperons
Et serons remis sus, en l'eure -
40. Dea, en peu d'eure Dieu labeure -
Car s'il convient que je m'aplicque
A bouter avant ma praticque,
On ne sçaura trouver mon per.

GUILLEMETTE

Par Saint Jaques, non, de tromper !
45. Vous en estes ung fin droit
maistre.

PATHELIN

Par celluy Dieu qui me fist naistre,
Mais de droite advocasserie.

GUILLEMETTE

Par ma foy, mais de tromperie !
Combien vrayement je m'en advise,
50. Quant, a vray dire, sans clergise
Et de sens naturel, vous estes

Tenu l'une des saiges testes
Qui soit en toute la parroisse !

PATHELIN

Il n'y a nul qui se connoisse
55. Si hault en advocacion.

GUILLEMETTE

M'aist Dieu, mais en trompacion.
Au mains en avez vous le los.

PATHELIN

Si ont ceulx qui de camelos
Sont vestus et de camocas,
60. Qui dient qu'ilz sont advocas,
Mais pourtant ne le sont ilz mye.
Laissons en paix ceste baverie :
Je m'en vueil aler a la foire.

GUILLEMETTE

A la foire ?

PATHELIN

Par Saint Jehan, voire.
65. « A la foire, gentil marchande » ...
Vous desplaist il, se je marchande
Du drap ou quelque aultre suffraige
Qui soit bon a nostre mesnaige ?
Nous n'avons robbe qui rien vaille.

GUILLEMETTE

70. Vous n'avez ne denier ne maille.
Qu'i ferez vous ?

PATHELIN

Vous ne sçavez.
Belle dame, se vous n'avez
Du drap pour nous deux largement,
Si me desmentez hardiement.
75. Quel couleur vous semble plus
belle
D'ung gris vert ou d'une brunette
Ou d'aultre ? Il le me fault sçavoir.

GUILLEMETTE

Tel que vous le pourrez avoir.
Qui emprunte ne choisist mye.

PATHELIN

en contant sur ses dois.

80. Pour vous : deux aulnes et demye,
Et pour moy : trois, voire bien
quatre...
Ce sont ...

GUILLEMETTE

Vous comptez sans rabatre.
Qui dyable les vous prestera ?

PATHELIN

Que vous en chault, qui ce fera?
85. On les me prestera vraiment
A rendre au jour du Jugement ;
Car plus tost ne sera ce point.

GUILLEMETTE

Avant, mon amy, en ce point.
Qui que soit, en sera couvert.

PATHELIN

90. J'acheteray ou gris ou vert.
Et pour ung blanchet, Guillemette,
Me fault .iii. quartiers de brunette
Ou une aulne.

GUILLEMETTE

Se m'aist Dieu, voire !
Alez, n'oubliez pas a boire,
95. Se vous trouvez Martin Garant.

PATHELIN

Gardez tout.

GUILLEMETTE

Hé ! Dieu, quel marchant ?...
Pleust or a Dieu, qu'il n'y vist goutte !

PATHELIN

N'est ce pas yla ? J'en fais doubte...
Et si est, par Sainte Marie,
100. Il se mesle de drapperie.
Dieu y soit !

GUILLAUME JOCEAULME,
DRAPPIER

Et Dieu vous doit joye !

PATHELIN

Or ainsi, m'aist Dieu, que j'avoye
De vous vëoir grant volenté.
Comment se porte la santé ?
105. Estes vous sain et dru,
Guillaume ?

LE DRAPPIER

Ouy, par Dieu !

PATHELIN

Sà, ceste paulme !
Comment vous va ?

LE DRAPPIER

Et bien, vrayement,
A vostre bon commandement.
Et vous ?

PATHELIN

Par Saint Pierre l'Apostre,
110. Comme celluy qui est tout vostre.
Ainsi vous esbatez ?

LE DRAPPIER

Et voire
Mais marchans, ce devez vous croire,
Ne font pas tousjours a leur guise.

PATHELIN

Comment se porte marchandise ?
115. S'en peult on ne soigner ne
paistre ?

LE DRAPPIER

Et, se m'aist Dieu, mon doulx maistre,
Je ne sçay. Tousjours « Hay, avant ! »

PATHELIN

Ha ! qu'estoit ung homme sçavant
(Je requier Dieu qu'il en ait l'ame)

120. De vostre pere, douce dame !

(Il m'est advis tout clerement
Que c'est il de vous proprement)
Qu'estoit ce ung bon marchant et
saige !

(Vous luy resezblez de visaige,

125. Par Dieu, comme droite
painture)
Se Dieu eust oncq de creature
Mercy, Dieu vray pardon luy face
A l'ame !

LE DRAPPIER

Amen, par sa grace,
Et de nous quand il luy plaira !

PATHELIN

130. Par ma foy, il me desclaira
Maintesfois et bien largement
Le temps qu'on voit presentement.
Moult de fois m'en est souvenu.

Et puis lors il estoit tenu

135. Ung des bons.

LE DRAPPIER

Seëz vous, beau sire,
Il est bien temps de le vous dire !
Mais je suis ainsi gracieux.

PATHELIN

Je suis bien, par le corps precieux.
Il avoit...

LE DRAPPIER

Vrayement, vous serrer.

PATHELIN

140. Voulentiers. « Ha ! que vous
verrez,

Qu'il me disoit, de grans merveilles ! »

Ainsi m'aist Dieu, que des oreilles,
Du nez, de la bouche et des yeulx
Oncq enfant ne reseblast mieulx

145. A pere ! Quel menton forché !
Vrayement, c'estes vous tout poché.

Et qui diroit à vostre mere
Que ne feussiez filz vostre pere,
Il auroit grant fain de tancer.

150. Sans faulte, je ne puis penser
Comment Nature en ses ouvraiges
Forma deux si pareilz visaiges
Et l'ung comme l'autre tachié.

Car quoy ? Qui vous aroit crachié

155. Tous deux encontre la paroy
D'une maniere et d'ung arroy.

Si seriez vous sans difference.

Or, sire, la bonne Laurence,
Vostre belle ante, morut elle ?

LE DRAPPIER

160. Nennin, dea.

PATHELIN

Que la vi je belle
Et grande et droite et gracieuse !
Par la mere Dieu precieuse,
Vous luy resezblez de corsaigne,
Comme qui vous eust fait de naige.

165. En ce pais n'a, se me semble,
Lignaige qui mieulx se resezble.
Tant plus vous voy, par Dieu le pere,
Veez vous là, veëz vostre pere !

Vous luy resezblez mieulx que goute

170. D'eaue, je n'en fais nulle doubtte.
Quel vaillant bachelier c'estoit,

Le bon preudomme, et si prestoit
Ses denrees a qui les vouloit.
Dieu luy pardoint, il me souloit
175. Tousjours de si tres bon cueur
rire.
Peust a Ihesucrist, que le pire
De ce monde luy resemblast !
On ne tollist pas ne n'emblast
L'ung a l'autre oomme l'en fait. ...
180. Que ce drap ycy est bien fait,
Qu'est il souef, doux et traictis !

LE DRAPPIER

Je l'ay fait faire tout faictis
Ainsi des laines de mes bestes.

PATHELIN

En hen ! Quel mesnaiger vous estes.
185. Vous n'en ystriez pas de l'orine
Du pere. Vostre corps ne fine
Tousjours, tousjours de besoingnier.

LE DRAPPIER

Que voulez vous ? Il fault songner,
Qui veult vivre, et soustenir paine.

PATHELIN

190. Cestuy cy est il taint en laine ?
Il est fort comme ung cordoen.

LE DRAPPIER

C'est ung tres bon drap de Rouen,
Je vous prometz, et bien drappé.

PATHELIN

Or vrayement j'en suis attrappé !

195. Car je n'avoie intencion
D'avoir drap, par la Passion
De Nostre Seigneur, quant je vins.
J'avoie mis appart quatre vings
Escus pour retraire une rente.
200. Mais vous en aurez vingt ou
trente,
Je le voy bien, car la couleur
M'en plaist tres tant que c'est douleur.

LE DRAPPIER

Escus ?

PATHELIN

Voire.

LE DRAPPIER

Ce peut il faire
Que ceulx, dont vous devez retraire
205. Cette rente, prinsent monnoye ?

PATHELIN

Et ouÿ bien, se je vouloye ;
Tout m'en est ung en paiement.
Quel drap est ce cy ? Vrayement,
Tant plus le voy et plus m'assotte.
210. Il m'en fault avoir une cotte,
Bref, et a ma femme de mesme.

LE DRAPPIER

Certes, drap est chier comme cresse.
Vous en aurez, se vous voulez.
Dix ou vingt frans y sont coulez
215. Si tost !

PATHELIN

Ne me chault, couste et vaille !
Encor ay je denier et maille
Qu'onc ne virent pere ne mere.

LE DRAPPIER

Dieu en soit loué ! Par Saint Pere,
Il ne m'en desplairoit enpiece.
220. Bref je suis gros de ceste piece.
Il m'en convient avoir.

LE DRAPPIER

Or bien,
Il convient adviser, combien
Vous en voulez, premierement.
Tout est a vostre commandement,
225. Quanque il en y a en la pille,
Et n'eussiez vous ne croix ne pille !

PATHELIN

Je le sçay bien, vostre mercy.

LE DRAPPIER

Voulez vous de ce pers cler cy ?

PATHELIN

Avant ! Combien me coustera
230. La premiere aulne ? Dieu sera
Payé des premiers, c'est rayson.
Vecy ung denier, ne faisons
Rien qui soit, ou Dieu ne se nomme.

LE DRAPPIER

Par Dieu, vous dittes que bon
homme,
235. Et m'en avez bien resjouy.

Voulez vous a ung mot ?

PATHELIN

Ouÿ.

LE DRAPPIER

Chascune aulne vous coustera
Vingt et quatre solz.

PATHELIN

Non fera !
Vingt et quatre solz, Sainte Dame !

LE DRAPPIER

240. Il le m'a cousté, par ceste ame !
Autant m'en fault se vous l'avez.

PATHELIN

Dea, c'est trop.

LE DRAPPIER

Ha ! vous ne sçavez
Comment le drap est enchery.
Trestout le bestall est peri
245. Cest yver par la grant froidure.

PATHELIN

Vingt solz, vingt solz !

LE DRAPPIER

Et le vous jure
Que j'en auray ce que je dy.
Or attendez a samedi :
Vous verrez que vault ! La toison,

250. Dont il souloit estre foison.
Me cousta, a la Magdalene,
Huit blans, par mon serment, de laine
Que je souloie avoir pour quatre.

PATHELIN

Par le sang bieu sans plus debate,
255. Puis qu'ainsi va done je
marchande.
Sus, aulnez.

LE DRAPPIER

Et je vous demande,
Combien vous en fault il avoir ?

PATHELIN

Il est bien aysié a savoir.
Quel lé a il ?

LE DRAPPIER

Lé de Brucelle.

PATHELIN

260. Trois aulnes pour moy et pour
elle
(Eile est haulte) deux et demye,
Ce sont six aulnes... ne sont mie...
Et non sont... que je suis bec jaune.

LE DRAPPIER

Il ne s'en fault que demie aulne
265. Pour faire les six justement.

PATHELIN

J'en prendray six tout rondement,

Aussy me fault il chapperon.

LE DRAPPIER

Prenez là ! Nous les aulneron.
Si sont elles oy, sans rabatre,
270. Empreu... et deux... et trois...
et quatre.
Et cinq... et six.

PATHELIN

Ventre Saint Pierre,
Ric a ric !

LE DRAPPIER

Aulneray je arriere.

PATHELIN

Nenny, de par une longaine.
Il y a ou plus perte ou gaigne
275. En la marchandise. Combien
Monte tout ?

LE DRAPPIER

Nous le sçaurons bien.
A vingt et quatre solz chascune :
Les six, neuf frans.

PATHELIN

Hen ! c'est pour une...
Ce sont huit escus.

LE DRAPPIER

M'aist Dieu, voire.

PATHELIN

280. Or, sire, les voulez vous croire
Jusques à ja quant vous vendrez ?...
Non pas croire : Vous les prendrez
A mon huis, en or ou monnoie.

LE DRAPPIER

Nostre Dame, je me tordroye
285. De beaucoup, à aler, par là.

PATHELIN

Hee ! Vostre bouche ne parla
Depuis, par monseigneur Saint Gille,
Qu'el ne disoit pas evangille.
C'est tres bien dit : Vous vous
tordriez.
290. C'est cela ! Vous ne voudriez
Jamais trouver nulle achoison
De venir boire en ma maison.
Or y bevez vous ceste fois.

LE DRAPPIER

Et par Saint Jaques, je ne fais
295. Guerres aultre chose que boire.
Je iray. Mais il fait mal d'acroire,
Ce sçavez vous bien, a l'estraïne.

PATHELIN

Souffist il se je vous estraine
D'escus d'or, non pas de monnoye ?
300. Et si mangerez de mon oye,
Par Dieu, que ma femme rotist.

LE DRAPPIER

Vrayement, cest homme m'assotist.
Allez devant ! sus, je yray doncques

Et le porteray...

PATHELIN

Rien quiconques !
305. Que me grevera il - pas maille ! -
Soubz mon esselle ?

LE DRAPPIER

Ne vous chaille.
Il vault mieux, pour le plus honeste.
Que je le porte.

PATHELIN

Male feste
M'en voist, la Sainte Magdalene,
310. Se vous en prenez jà la paine.
C'esi tres bien dit : dessoubz l'esselle.
Cecy m'y fera une belle
Bosse. Ha ! C'est tres bien alé...
Il y aura beu et gallé
315. Chiez moy, ains que vous en
aillez.

LE DRAPPIER

Je vous pry que vous me baillez
Mon argent, dez que je y seray.

PATHELIN

Feray... Et, par Dieu, non feray,
Que n'ayez prins vostre repas
320. Tres bien ; et si ne voudroye pas
Avoir sur moy de quoy payer,
Au mains viendrez vous essayer
Quel vin je boy. Vostre feu pere,
En passant, huchoit bien :
« Compere »,
325. Ou « Que dis tu ? » ou « Que fais

tu ? »
Mais vous ne prizez ung festu,
Entre vous riches, povres hommes.

LE DRAPPIER

Et par le saint sang bieu, nous
sommés
Plus povres...

PATHELIN

Ouay ? A Dieu, à Dieu !
330. Rendez vous tantost au dit lieu
Et nous bevrans bien, je m'en vant.

LE DRAPPIER

Si feray je. Alez devant
Et que j'aye or.

PATHELIN

Or ? Et quoy doncques ?
Or ? Dyable, je n'y failly oncques.
335. Non ! Or ? qu'il puist estre
pendu !
En ! dea. il ne m'a pas vendu
A mon mot, ce a este au sien,
Mais il sera payé au myen.
Il luy fault or ? on le luy fourre !
340. Pleust à Dieu, qu'il ne fist que
courre
Sans cesser jusque à fin de paye :
Saint Jehan, il feroit plus de voye
Qu'il n'y a jusque a Pampelune.

LE DRAPPIER

Ilz ne verront soleil ne lune,
345. Les escus qu'il me baillera,
De l'an, qui ne les m'emblera.

Or n'est il si fort entendeur,
Qui ne treuve plus fort vendeur.
Ce trompeur la est bien bec jaune,
350. Quant pour vingt et quatre solz
l'aulne
A prins drap qui n'en vault pas vingt.

PATHELIN

En ay je ?

GUILLEMETTE

De quoy ?

PATHELIN

Que devint
Vostre vielle cote hardie ?

GUILLEMETTE

Il est grant besoing qu'on le dye.
355. Qu'en voulez vous faire ?

PATHELIN

Rien, rien.
En ay je ? je le disoye bien.
Est il ce drap cy...

GUILLEMETTE

Sainte Dame,
Or, par le peril de mon ame,
Il vient d'aucune couverture.
360. Dieux ! dont nous vient ceste
aventure ?
Helas, hélas ! qui le payera ?

PATHELIN

Demandez vous qui ce fera ?
Par Saint Jehan, il est ja païé.
Le marchant n'est pas desvoie,
365. Belle seur, qui le m'a vendu.
Parmy le col soye je pendu,
S'il n'est blanc comme un sac de
piastre.
Le meschant villain challemastre
En est ceint sur le cul.

GUILLEMETTE

Combien
370. Couste il doncques ?

PATHELIN

Je n'en doy rien ;
Il est paye, ne vous en chaille.

GUILLEMETTE

Vous n'aviez ne denier ne maille.
Il est paye en quel monnoye ?

PATHELIN

Et par le sang bieu, si avoye.
375. Dame, j'avoye un par si.

GUILLEMETTE

C'est bien alé ! Le beau nisi
Ou ung brevet y ont ouvré :
Ainsi l'avez vous recouvré.
Et quant le terme passera,
380. On viendra, on nous gaigera ;
Quancque avons, nous sera osté.

PATHELIN

Par le sang bieu, il n'a couste
Que un denier, quant qu'il en y a.

GUILLEMETTE

Benedicite Maria !
385. Que un denier ? Il ne se peult
faire.

PATHELIN

Je vous donne cest oeil à traire,
S'il en a plus eu n'en aura,
Ja si bien chanter ne saura.

GUILLEMETTE

Et qui est il ?

PATHELIN

C'est un Guillaume
390. Qui a seurnom de Joceaulme,
Puis que vous le voulez sçavoir.

GUILLEMETTE

Mais la maniere de l'avoir
Pour un denier ? et a quel jeu ?

PATHELIN

Ce fut pour le denier à Dieu.
395. Et encore se j'eusse dit :
« La main sur le pot », par ce dit
Mon denier me fust demouré.
Au fort, est ce bien labouré ?
Dieu et luy partiront ensemble
400. Ce denier la, se bon leur semble.
Car c'est tout quant qu'ilz en auront,

Jà si bien chanter ne sçauront,
Ne pour crier ne pour brester.

GUILLEMETTE

Comment l'a il voulu prester
405. Luy qui est ung homs si rebelle ?

PATHELIN

Par sainte Marie la belle,
Je l'ay armé et blasonné
Tant qu'il le m'a presque donné.
Je luy disoye que son feu pere
410. Fut si vaillant « Ha ! fais je, frere,
Qu'estes vous de bon parentaige.
Vous estes, fais je, du lignaige
D'icy entour plus a louer ». (Mais je puisse Dieu avouer,
415. S'il n'est attrait d'une peaultraille,
La plus rebelle villenaille
Qui soit, ce croy je, en ce royaulme)
« Ha ! fais je, mon amy Guillaume,
Que ressemblez vous bien de chiere
420. Et du tout a vostre bon pere ! »
Dieu sçait comment j'eschaffauldoye
(Et, a la fois, j'entrelardoye,
En parlant de sa drapperie)
« Et puis, fais je, Sainte Marie,
425. Comment prestoit il doucement
Ses denrees et si humblement !
C'estes vous, fais je, tout crachié »
(Toutesfois on eust ariachié
Les dens du villain marsouyn,
430. Son feu pere, et du babuyn,
Le filz, avant qu'il en prestassent
Cecy, ne que ung beau mot parlassent)
Mais, au fort, ay je tant bresté
Et parle, qu'il m'en a presté
435. Six aulnes.

GUILLEMETTE

Voire, à jamais rendre.

PATHELIN

Ainsi le devez vous entendre.
Rendre ? On luy rendra le dyable.

GUILLEMETTE

Il m'est souvenu de la fable
Du corbeau qui estoit assis
440. Sur une croix de cinq a six
Toises de hault, lequel tenoit
Ung fromaige au bec. La venoit
Ung renard qui vit ce fromaige.
Pensa a luy : « Comment l'aurai ge ? »
445. Lors se mist dessoubz le corbeau.
« Ha, fist il, tant as le corps beau
Et ton chant plain de melodie ! »
Le corbeau par sa cornardie,
Oyant son chant ainsi vanter,
450. Si ouvrit le bec pour chanter
Et son fromaige chiet a terre ;
Et maistre Renard le vous serre
A bonnes dens et si l'emporte.
Ainsi est il, je m'en fais forte,
455. De ce drap ; vous l'avez happé,
Par blasonner, et attrappé,
En luy usant de beau langaige,
Comme fist Renard du fromaige.
Vous l'en avez prins par la moe.

PATHELIN

460. Il doit venir manger de l'oe.
Mais vecy qu'il nous faudra faire :
Je suis certain qu'il viendra braire,
Pour avoir argent, promptement.
J'ay pené bon appointment :
465. Il esconvient que je me couche

Comme malade sur ma couche
Et quand il viendra, vous direz :
« Ha ! parlez bas » et gemirez,
En faisant une chiere fade.
470. « Las ! ferez vous, il est malade
Passé deux moys ou six sepmaines. »
Et si vous dit : « Ce sont trudaines,
Il vient d'avec moy tout venant. »
« Helas ! ce n'est pas maintenant,
475. Ferez vous, qu'il fault rigoler. »
Et le me laissez flageoler,
Car il n'en aura aultre chose.

GUILLEMETTE

Par l'ame qui en moy repose,
Je feray tres bien la maniere
480. Mais se vous rencheez arriere,
Que justice vous en repreigne
Je me doubte qu'il ne vous preigne
Pis la moitié que l'autre fois.

PATHELIN

Or paix ! Je sçay bien que je fais.
485. Il fault faire ainsi que je dy.

GUILLEMETTE

Souviengne vous du samedi,
Pour Dieu, qu'on vous pilloria.
Vous sçavez que chascun cria
Sur vous pour vostre tromperie.

PATHELIN

490. Or laissez celle baverie.
Il viendra, nous ne gardons l'heure...
Il fault que ce drap nous demeure...
Je m'en vois coucher.

GUILLEMETTE

Alez doncques.

PATHELIN

Or ne riez point.

GUILLEMETTE

Rien quiconques !
495. Mais pleureray a chaudes larmes.

PATHELIN

Il nous fault estre tous deux fermes,
Afin qu'il ne s'en apparçoive.

LE DRAPPIER

Je croy qu'il est temps que je boive
Pour m'en aller. He ! Non feray.
500. Je doy boire et si mangeray
De l'oye, par saint Mathelin,
Chiez maistre Pierre Pathelin.
Et là recevray je pecune ;
Je happeray là une prune,
505. A tout le moins, sans rien
despendre.
Je y vois, je ne puis plus rien vendre.
Hau ! maistre Pierre !

GUILLEMETTE

Helas ! sire,
Pour Dieu, se vous voulez rien dire,
Parlez plus bas.

LE DRAPPIER

Dieu vous gart, dame !

GUILLEMETTE

510. Ho ! plus bas...

LE DRAPPIER

Et quoy ?

GUILLEMETTE

Bon gre m'ame.

LE DRAPPIER

Ou est il ?

GUILLEMETTE

Las ! ou doit il estre ?

LE DRAPPIER

Le qui ?

GUILLEMETTE

Ha ! c'est mal dit, mon maistre.

Ou il est ? Dieu par sa grace

Le sache ! Il garde la place

515. Ou il est, le povre martir,

Unze sepmaines sans partir.

LE DRAPPIER

Le qui ?

GUILLEMETTE

Pardonnez moy, je n'ose

Parler hault, je croy qu'il repose.

Il est ung petit aplommé.

520. Helas ! il est si assommé,

Le povre homme,

LE DRAPPIER

Qui ?

GUILLEMETTE

Maistre Pierre,

LE DRAPPIER

Qu'a il ? N'est il pas venu querre
Six aulnes de drap maintenant ?

GUILLEMETTE

Qui, luy ?

LE DRAPPIER

Il en vient tout venant

525. N'a pas la moitié d'un quart
d'heure.

Delivrez moy (dea, je demeure
Beaucoup) sà, sans plus flageoler,
Mon argent !

GUILLEMETTE

Hee ! sans rigoler.

Il n'est pas temps que l'en rigole.

LE DRAPPIER

530. Sà, mon argent ! Estes vous
folle ?

Il me fault neuf frans.

GUILLEMETTE

Ha ! Guillaume,

Il ne fault point couvrir de chaume
Ycy ne baillier ses broears

Alez sorner à voz coquars
535. A qui vous vous voudrez jouer.

LE DRAPPIER

Je puisse Dieu desavouer,
Se je n'ay neuf frans.

GUILLEMETTE

Helas ! sire,
Chascun n'a pas si fain de rire,
Comme vous, ne de flagorner.

LE DRAPPIER

540. Dittes, je vous pry, sans sorner,
Par amour, faictes moy venir
Maistre Pierre.

GUILLEMETTE

Mesavénir
Vous puist il ! Et esse à meshuy ?

LE DRAPPIER

N'esse pas ceans que je suy
545. Chiez maistre Pierre Pathelin ?

GUILLEMETTE

Ouy. Le mal Saint Mathelin,
Sans le mien, au cueur vous tienne.
Parlez bas !

LE DRAPPIER

Le dyable y adviengne !
Ne l'oseray je demander ?

GUILLEMETTE

550. A Dieu me puisse commander !
Bas, se voulez qu'il ne s'esveille.

LE DRAPPIER

Quel bas ? Voulez vous en l'oreille,
Au fons du puis ou de la cave ?

GUILLEMETTE

He ! Dieu, que vous avez de bave.
555. Au fort, c'est tousjours vostre
guise.

LE DRAPPIER

Le dyable y soit, quant je m'avise.
Se voulez que je parle bas,
Dittes, sà, quant est de debas
Ytelz ? Je ne l'ay point aprins.
560. Vray est que maistre Pierre a
prins
Six aulnes de drap au jour d'huy.

GUILLEMETTE

Et qu'esse cy ? Esse a meshuy ?
Dyable y alt parti Aga, quel prendre ?
Ha ! sire, que l'en le puist pendre,
565. Qui ment ! Il est en tel parti,
Le pouvre homme, qu'il ne partit
Du lict, y a unze sepmaines.
Nous baillez vous de voz trudaines ?
Main tenant en esse rayson ?
570. Vous vuidez de ma maison,
Par les angoisses Dieu, moy lasse !

LE DRAPPIER

Vous disiez que je parlasse

Si bas, sainte benoiste Dame,
Vous criez.

GUILLEMETTE

C'estes vous, par m'ame,
575. Qui ne parlez fors que de noise.

LE DRAPPIER

Dittes, affin que je m'en voise,
Baillez moy...

GUILLEMETTE

Parlez bas, ferez ?

LE DRAPPIER

Mais vous mesmes l'esveillerez
Vous parlez plus hault quatre fois,
580. Par le sang bieu, que je ne fais.
Je vous requier qu'on me delivre.

GUILLEMETTE

Et qu'esse cy ? Estes vous yvre
Ou hors du sens, Dieu nostre pere ?

LE DRAPPIER

Yvre ? Maugré en ait Saint Pere !
585. Vecy une belle demande.

GUILLEMETTE

Helas ! plus pas !

LE DRAPPIER

Je vous demande
Pour six aulnes, bon gré Saint George,

De drap, dame.

GUILLEMETTE

On le vous forge !
Et a qui l'avez vous baillé ?

LE DRAPPIER

590. A luy mesme.

GUILLEMETTE

Il est bien taillé
D'avoir drap ! Helas ! il ne hobe,
Il n'a nul mestier d'avoir robe.
Jamais robe ne vestira
Que de blanc ne ne partira,
595. Dont il est, que les pies devant.

LE DRAPPIER

C'est donc depuis soleil levant,
Car j'ay a luy parle, sans faulte.

GUILLEMETTE

Vous avez la voix si tres haulte,
Parlez plus bas, en charité.

LE DRAPPIER

600. C'estes vous, par ma vérité,
Vous mesmes, en sanglante estraine !
Par le sanc bieu, vecy grant paine.
Qui me paiast, je m'en alasse.
Par Dieu, oncques que je prestasse,
605. Je n'en trouvé point aultre chose.

PATHELIN

Guillemette, ung peu d'eaue rose !

Haussez moy, serrez moy derriere !
Trut ! A qui parlé je ? L'esguiere
A boire ! Frotez moy la plante !

LE DRAPPIER

610. Je l'oy là.

GUILLEMETTE

Voire.

PATHELIN

Ha ! meschante,
Vien sà. T'avoie je fait ouvrir
Ces fenestres ? Vien moy couvrir.
Oste ces gens noirs ! Marmara,
Carimari, carimara !
615. Amenez les moy, amenez.

GUILLEMETTE

Qu'esse ? Comment vous demenez,
Estes vous hors de vostre sens ?

PATHELIN

Tu ne vois pas ce que je sens.
Vela ung moine noir qui vole.
620. Prends le, baille luy une estolle.
Au chat ! au chat ! comment il monte !

GUILLEMETTE

Et qu'esse cy ? N'a vous pas honte ?
Et, par Dieu, c'est trop remué.

PATHELIN

Ces phisiciens m'ont tué
625. De ces broulliz qu'il m'ont fait
boire.

Et toutesfois les fault il croire,
Ilz en oeuvrent comme de cire.

GUILLEMETTE

Helas ! venez le veoir, beau sire,
Il est si tres mal pacient.

LE DRAPPIER

630. Est il malade, à bon essient,
Puis orains qu'il vint de la foire ?

GUILLEMETTE

De la foire ?

LE DRAPPIER

Par Saint Jehan, voire,
Je cuide qu'il y a este.
Du drap, que je vous ay presté,
635. Il m'en fault l'argent, maistre
Pierre.

PATHELIN

Ha ! maistre Jehan, plus dur que pierre
J'ay chié deux petites crottes
Noires, rondes comme pelotes.
Prenderay je ung aultre cristere ?

LE DRAPPIER

640. Et que sçay je ? Qu'en ay je à
faire ?
Neuf frans m'y fault ou six escus.
Ces trois morceaux noirs et beouz
Les m'appellez vous pillouères ?
Ilz m'ont gaste les machouères,
645. Pour Dieu, ne m'en faictes plus
prendre.

Maistre Jehan, il ont fait tout rendre.
Ha ! il n'est chose plus amere.

LE DRAPPIER

Non ont, par l'ame de mon pere,
Mes neuf frans ne sont point rendus.

GUILLEMETTE

650. Parmi le col soyent pendus
Telz gens qui sont si empeschables !
Alez vous en, de par les dyables,
Puisque de par Dieu ne peult estre !

LE DRAPPIER

Par celluy Dieu qui me fist naistre,
655. J'auray mon drap, ains que je
fine,
Ou mes neuf frans.

PATHELIN

Et mon orine
Vous dit elle point que je meure ?
Helasi ! pour Dieu, quoy qu'il
demeure.
Que je ne passe point le pas !

GUILLEMETTE

660 Alez vous en ! Et n'esse pas
Mal fait de luy tuer la teste ?

LE DRAPPIER

Damedieu en ait male festel
Six aulnes de drap maintenant,
Dittes, esse chose advenant,
665. Par vostre foy, que je les perde ?

PATHELIN

Se peussiez esclarcir ma merde,
Maistre Jehan, elle est si tres dure
Que je ne sçay comment je dure,
Quant elle yst hors du fondement.

LE DRAPPIER

670. Il me fault neuf frans rondement.
Que bon gré Saint Pierre de Romme !

GUILLEMETTE

Helas ! tant tormentez cest homme !
Et comment estes vous si rude ?
Vous veëz clerement qu'il cuide
675. Que vous soyez phisicien.
Helas ! le povre chrestien
A asses de male meschance.
Unze sepmaines sans laschance
A esté illec le povre homme.

LE DRAPPIER

680. Par le sanc bieu, je ne sçay
comme
Cest accident luy est venu :
Car il est au jour d'huy venu
Et avons marehandé ensemble...
A tout le moins, comme il me semble,
685. Ou je ne sçay que se peult estre.

GUILLEMETTE

Par Nostre Dame, mon doulx maistre,
Vous n'estes pas en bon memoire.
Sans faulte, se me voulez croire,
Vous irez ung peu reposer.
690. Moult de gens pourroient gloser
Que vous venez pour moy ceans.
Alez hors. Les phisiciens

Viendront icy tout en presence.

LE DRAPPIER

Je n'e cure que l'en y pense
695. A mal, car je n'y pense point.
Et maugré bieu ! Suis je en ce point ?
Par la teste Dieu, je cuidoye...

GUILLEMETTE

Encor...

LE DRAPPIER

Et n'avez vous point d'oye
Au feu ?

GUILLEMETTE

C'est tres belle demande !
700. Ha ! sire, ce n'est pas viande
Pour malades. Mangez vos oes,
Sans nous venir jouer des moes.
Par ma foy, vous estes trop aise.

LE DRAPPIER

Je vous pri qu'il ne vous desplaise,
705. Car je cuidoye fermement...

GUILLEMETTE

Encore.

LE DRAPPIER

Par le Sacrement...
A Dieu !...dea, or je vois savoir...
Je sçay bien que j'en doy avoir
Six aulnes tout en une piece.
710. Mais ceste femme me depiece

De tous poins mon entendement.
Il les a eues vraiment...

Non a...Dea, il ne se peult joindre :
J'ay veu la mort qui le vient poindre,
715. Au mains ou il le contrefait...

Et si a... il les print de fait
Et les mist dessoubz son esselle.
Par sainte Marie la belle,

Non a... je ne sçay se je songe.
720. Je n'ay point aprins que je donge
Mes draps, en dormant ne veillant,
A nul, tant soit mon bienvueillant.

Je ne les eusse point acreues.

Par le sanc bieu, il les a eues...

725. Par la mort [bleu]! non a, ce tien
je,

Non a...Mais à quoy donc en vien je ?

Si a, par le sanc Nostre Dame !
Mescheoir puist il de corps et d'ame,
Se je sçay qui sauroit a dire,

730. Qui a le meilleur ou le pire
D'eulx ou de moy. Je n'y voy goute !

PATHELIN

S'en est il alé ?

GUILLEMETTE

Paix, j'escoute
Ne sçay quoy qu'il va flageolant.
Il s'en va si fort grumelant,
735. Qu'il semble qu'il doye desver.

PATHELIN

Il n'est pas temps de me lever.
Comme il est arrivé à point !

GUILLEMETTE

Je ne sçay s'il reviendra point.

Nenny, dea ! Ne bougez encore.
740. Nostre fait seroit tout frelore
S'il vous trouvoit levé

PATHELIN

Saint George !
Qu'est il venu a bonne forge,
Luy qui est si tres mescreant.
Il est en luy trop mieulx seant
745. Que ung crucifix en ung
moustier.

GUILLEMETTE

En ung tel ort villain broustier ?
Oncq lart is pois ne cheut si bien !
Avoy, dea, il ne faisoit rien
Aux dimenches.

PATHELIN

Pour Dieu, sans rire,
750. S'il venoit, il pourroit trop nuyre.
Je m'en tien fort, qu'il reviendra.

GUILLEMETTE

Par mon serment, il s'en tiendra
Qui voudra ; mais je ne pourroye.

LE DRAPPIER

Et, par le saint soleil qui raye,
755. Je retourneray, qui qu'en grouse,
Chiez cest advocat d'eau doulce.
He ! Dieu, quel retraieur de rentes
Que ses parens ou ses parentes
Auroyent vendu ! Or, par Saint Pierre,
760. Il a mon drap, le faulx
tromperre ;
Je luy baillé en ceste place.

GUILLEMETTE

Quant me souvient de la grimace,
Qu'il faisoit en vous regardant,
Je ry. Il estoit si ardant
765. De demander.

PATHELIN

Or paix, riace !
Je regnie bieu (que ja ne facet)
S'il avenoit qu'on vous ouyst.
Autant vaudroit qu'on s'en fouyst.
Il est si tres rebarbatif.

LE DRAPPIER

770. Et cest advocat potatif
A trois leçons et trois pséalmes
(Et tient il les gens pour Guillaumes ?)
Il est, par Dieu, aussi pendable
Comme seroit ung blanc prenable.
775. Il a mon drap ou je regnie bieu
Et m'a il joué de ce jeu.
Hau là ! où estes vous fouye ?

GUILLEMETTE

Par mon serment, il m'a ouye,
Il semble qu'il doye desver.

PATHELIN

780. Je feray semblant de resver
Alez là !

GUILLEMETTE

Comment vous criez !

LE DRAPPIER

Bongré en ait Dieu, vous riez !
Sà, mon argent !

GUILLEMETTE

Sainte Marie,
De quoy cuidez vous que je rie ?
785. Il n'a si dolente en la feste.
Il s'en va. Oncques tel tempeste
No ouystes ne tel frenaisie.
Il est encor en lesverie :
Il resve, il chante ; il fatrouille
790. Tant de langaiges et barbouille,
Il ne vivra pas demys heure.
Par ceste ame, je ri et pleure
Ensemble.

LE DRAPPIER

Je ne sçay quel rire
Ne quel plourer ; a brief vous dire,
795. Il fault que je soye paye.

GUILLEMETTE

De quoy ? Estes vous desvoye ?
Recommancez vous vostre verve ?

LE DRAPPIER

Je n'ay point aprins, qu'on me serve
De telz motz, en mon drap vendant.
800. Me voulez vous faire entendant
De vecies que ce sont lanternes ?

PATHELIN

Sus tost, la royne de Guiternes
A coup qu'el me soit aprouchee.
Je sçay bien qu'elle est acouchée

805. De vingt et quatre guiterneaux
Enfans a l'abbé d'Iverneaux
Il me fault estre son compere.

GUILLEMETTE

Helas ! pensez a Dieu le pere,
Mon amy, non pas en guiternes.

LE DRAPPIER

810. He ! quelz bailleurs de balivernes
Sont ce cy ! Or tost que je soye
Payé, en or ou en monnoye,
De mon drap que vous avez prins.

GUILLEMETTE

He ! dea, se vous avez mesprins
815. Une fois, ne souffist il mye ?

LE DRAPPIER

Savez vous qu'il est, belle amy ?
M'aist Dieu, je ne sçay quel
mesprendra.
Mais quoy ? Il convient rendre ou
pendre.
Quel tort vous fais je, se je vien
820. Ceans pour demander le myen ?
Que bongré Saint Pierre de Romme !

GUILLEMETTE

Helas ! tant tormentez cest homme,
Je voy bien a vostre visaige
Certes que vous n'estes pas saige.
825. Par ceste pecheresse lasse,
Se j'eusse aide, je vous liasse !
Vous estes trestout forcené.

LE DRAPPIER

Helas ! j'enraige que je n'ay
Mon argent.

GUILLEMETTE

Ha ! quel niceté !
830. Seignez vous, benedicté,
Faictes le signe de la croix !

LE DRAPPIER

Or regnie je bieu, se j'acrois
De l'année drap ! quel malade !

PATHELIN

Mere de Diou, la coronade,
835. Par fye, y men vuol anar,
Or renague bioul outre mar.
Veintre de Diou ! z'en dit gigone
Castuy carrible, et res ne done,
Ne carrillaine, fuy ta none :
840. Que de l'argent il ne me sone.
Avez entendu, biau cousin ?

GUILLEMETTE

Il eust ung uncle lymosin,
Qui fut frere de sa belle ante,
C'est oe qui le fait, je me vante,
845. Gergonner en limosinois.

LE DRAPPIER

Dea, il s'en vint en tapinois
A tout mon drap soubz son esselle.

PATHELIN

Venez ens, douce damiselle,

Et que veult ceste crapaudaille ?
850. Alez en arriere, merdaille !
Sà tost je vueil devenir prestre.
Or sà ! que le dyable y puist estre
En chelle vielle prestreie !
Et fault il que le prestre rie
855. Quant il deüst canter se messe.

GUILLEMETTE

Helas ! Helas ! l'heure s'apresse,
Qu'il fault son dernier sacrement.

LE DRAPPIER

Mais comment parle il proprement
Picart ? Dont yient tel cocardie ?

GUILLEMETTE

860. Sa mere fut de Picardie,
Pour ce le parle il maintenant.

PATHELIN

Dont viens tu, caresme prenant ?
Wacarme ! lieve goede man,
Ettelie boec ick luclike can.
865. Henri, ey ! henri, ey ! com slapen.
Ick sal goed wesen gewapen.
Grille, grille, stooke vonden !
Geloop, geloop, een non gebonden !
Distichen uven desen versen
870. Mar groet festal ontwyt den
hersen.
Ey ! wacht een wile : comet rie.
Cha, à dringuer, je vous en prie,
Com mare, semar : Godes gave !
Et qu'on m'y mette ung peu d'eaue !
875. Vurst een wile pour le frimas.
Faictes venir sire Thomas
Tantost qui me confessera.

LE DRAPPIER

Qu'est ce cy ? Il ne cessera
Huy de parler divers langaiges.
880. Au moins qu'il me baillast ung
gaige
Ou mon argent, je m'en alasse.

GUILLEMETTE

Par les angoisses Dieu, moy lasse,
Vous estes ung bien divers homme !
Que voulez vous ? Je ne sçay comme
885. Vous estes si fort obstiné.

PATHELIN

Or cha ! Renouart au tiné
Be ! dea, que ma couille est pelouse !
Elle semble une cate pelouse
Ou a une mousque à miel.
890. Be ! parlez à moy, Gabriel.
Les playes Dieu, qu'esse qui s'ataque
A men coul ? esse une vaque,
Une mousque ou ung escarbot ?
Be ! dea, j'é le mau Saint Garbot.
895. Suis je des foyreux de Baieux ?
Jehan du quemin sera joyeux,
Mais qu'il saiche que je le sée,
Bee ! par Saint Miquiel, je berée
Voulientiers à luy une fes.

LE DRAPPIER

900. Comment peult il porter le fes
De tant parler ? Ha ! il s'afolle.

GUILLEMETTE

Celluy qui l'aprint a l'escolle.
Estoit Normant ; ainsi advient

Qu'en la fin il luy en souvient.
905. Il s'en va...

LE DRAPPIER

Ha ! Sainte Marie !
Veey la plus grant resverie,
Où je fusse, oncques mes, bouté !
Jamais ne me fusse doubté
Qu'il n'eust huy esté a la foire.

GUILLEMETTE

910. Vous le cuidiez ?

LE DRAPPIER

Saint Jaques, voire,
Mais j'aperçoy bien le contraire.

PATHELIN

Sont il ung asne que j'orré braire ?
Alast ! Alast ! cousin à moy,
Ilz le seront en grant esmoy,
915. Le jour quant je ne te verré.
Il convient que je te herré,
Car tu m'as fait grant trichery :
Ton fait il sont tout trompery.
Ha loul dan diaoulien ravezi
920. Corf hac eneuf !

GUILLEMETTE

Dieu vous ayst !

PATHELIN

Hui roz bezo ou drouc nos, badou
Digant an tan en hoz madou !
Empedif dioh guitebunan
Quez quement ol dre douch aman,

925. Men ez cachet hoz bouzelou
En un ober gront ha cavou,
Maz rehet truez dan hol con
So ol oz mervell gant nafon
Aluzen ! archet he pysy
930. Ha cals amour ha courtesy.

LE DRAPPIER

Helas ! pour Dieu, entendez y !
Il s'en va. Comment il guerguille!
Mais que dyable est ce qu'il
barbouille ?
Sainte Dame, comme il barbote !
935. Par le corps Dieu, il barbelote
Ses motz tant qu'on n'y entent rien.
Il ne parle pas crestien
Ne nul langaige qui apere.

GUILLEMETTE

Ce fut la mere de son pere
940. Qui fut attraicte de Bretagne.
Il se meurt, cecy nous enseigne
Qu'il fault ses derniers sacremens.

PATHELIN

He ! par Saint Gigon, tu te mens,
Vualx te Deu, couille de Lorraine,
945. Dieu te mette en bote sepmaine !
Tu ne vaulx mie une vielz nat.
Va, sanglante bote sanat !
Va, foutre, va, sanglant paillart,
Tu me refais trop le gaillart !
950 Par la mort bieu, sà, vien t'en
boire,
Et baille moy Stan grain de poire !
Car vrayement il le mangera
Et, par Saint Georges, il bara
A ty. Que veulx tu que je die ?
955. Dy, viens tu nient de Picardie ?

Jaques nient se sont ebob s.
Et bona dies sit vobis,
Magister amantissime,
Pater reverendissime,
960. Quomodo brulis ? Que nova ?
Parisius non sunt ova.
Quid petit ille mercator ?
Dicat sibi, quod trufator
Ille, qui in lecto jacet,
965. Vult ei dare, si placet,
De oca ad comedendum,
Si sit bona ad edendum.
Pete sibi sine mora !

GUILLEMETTE

Par mon serment, il se mourra
970. Tout parlant. Comment il
escume !
Veez vous pas comment il estime
Hautement la divinité ?
Or s'en va son humanité,
Or demourray je povre et lasse !

LE DRAPPIER

975. Il fust bon que je m'en alasse
Avant qu'il eust passé le pas.
Je doubte qu'il ne vouldist pas
Vous dire a son trespasement
Devant moy si priveement
980. Aucuns secretz, par aventure.
Pardonnez moy ! Car je vous jure
Que je cuidoye, par ceste ame,
Qu'il eust eu mon drap. A Dieu,
dame,
Pour Dieu, qu'il me soit pardonné !

GUILLEMETTE

985. Le benoist jour vous soit donné.
Si soit à la povre dolente !

LE DRAPPIER

Par Sainte Marie la gente,
Je me tiens plus esbaubely
Que oncques. Le dyable, en lieu de ly,
990. A prins mon drap pour moy
tenter !
Benedicite ! Atenter
Ne puist il jà a ma personne !
Et puis qu'ainsi va, je le donne.
Pour Dieu, a quiconques l'a prins.

PATHELIN

995. Avant ! vous ay je bien aprins ?
Or s'en va il, le beau Guillaume ;
Dieux ! qu'il a dessoubs son hëaulme
De menues conclusions.
Moult luy viendra d'avisions,
1000. Par nuyt, quant il sera couché.

GUILLEMETTE

Comment il a esté mouché !
N'ay je pas bien fait mon devoir ?

PATHELIN

Par le corps bieu, à dire veoir,
Vous y avez tres bien ouvré.
1005. Au moins avons nous recouvré
Asses drap pour faire des robbes.

LE DRAPPIER

Quoy, dea ! Chascun me paist de
lobes !
Chascun m'emporte mon avoir
Et prent ce qu'il en peult avoir.
1010. Or suis je le roy des meschans.
Mesmement les bergiers des champs
Me cabusent ; ores le mien,

A qui j'ay tousjours fait du bien,
Il ne m'a pas pour rien gabbé !
1015. Il en viendra au pié l'abbé,
Par la benoiste couronnée !

THIBAUT AIGNELET, BERGIER

Dieu vous doit benoiste journee
Et bon vespre, monseigneur doulx.

LE DRAPPIER

Ha ! es tu là, truant merdoux ?
1020. Quel bon varlet ! mais à quoy
faire ?

LE BERGIER

Mais qu'il ne vous vueille desplaire...
Ne sçay quel vestu de roié,
Mon bon seigneur, tout deroié,
Qui tenoit ung fouet sans corde,
1025. M'a dit... mais je ne me recorde
Point bien, au vray, que ce peult
estre...
Il m'a parlé de vous, mon maistre,
Et ne sçay quel adjournerie.
Quant à moy, par Sainte Marie,
1030. Je n'y entens ne gros ne gresle.
Il m'a broullé, de pelle mesle,
De « brebis » « à de relevée »,
Et m'a fait une grant levée
De vous, mon maistre, de boucler.

LE DRAPPIER

1035. Se je ne te fais emboucler
Tout maintenant devant le juge,
Je pri à Dieu que le deluge
Coure sur moy et la tempeste !
Jamais tu n'assomeras beste,
1040. Par ma foy, qu'il ne t'en

souviengne.
Tu me rendras, quoy qu'il adviengne,
Six aulnes... di je, l'assomaige
De mes bestes, et le dommaige
Que tu m'as fait depuis dix ans.

LE BERGIER

1045. Ne croiez pas les mesdisans,
Mon bon seigneur, car, pas ceste
ame...

LE DRAPPIER

Et par la dame que l'en clame,
Tu les rendras, au samedi,
Mes six aulnes de drap... je dy
1050. Ce que tu as prins sur mes
bestes.

LE BERGIER

Quel drap ? Ha ! monseigneur, vous
estes,
Ce croy, courroussé d'aulture chose.
Par Saint Leu, mon maistre, je n'ose
Riens dire, quant je vous regarde.

LE DRAPPIER

1055. Laisse m'en paix ! Va t'en et
garda
Ta journée, se bon te semble.

LE BERGIER

Monseigneur, acordons ensemble,
Pour Dieu, que je ne plaide point.

LE DRAPPIER

Va ! ta besongne est en bon point ;

1060. Va t'en, je n'en acorderay,
Par Dieu, ne n'en appointeray
Qu'ainsi que le juge fera.
Avoy ! chascun me trompera
Mesouën, se je n'y pourvoye.

LE BERGIER

1065. A Dieu, sire, qui vous doint
joye !
Il fault donc que je me defende.
A il ame là ?

PATHELIN

On me pende,
S'il ne revient, parmy la gorge.

GUILLEMETTE

Et non fait, que bon gré Saint
George !
1070. Ce seroit bien au pis venir.

LE BERGIER

Dieu aist ! Dieu y puist advenir.

PATHELIN

Dieu te gard, compains ! Que te fault ?

LE BERGIER

On me piquera en default,
Se je ne vois a ma journee,
1075. Monseigneur, à de relevée.
Et, s'il vous plaist, vous y vendrez,
Mon doulx maistre. et me deffendrez
Ma cause, car je n'y sçay rien,
Et je vous payeray tres bien,
1080. Pourtant se je suis mal vestu.

PATHELIN

Or vien ca et parle ! Qu'es tu,
Ou demandeur ou defendeur ?

LE BERGIER

J'ay affaire a ung entendeur,
Entendez vous bien, mon doulx
maistre,

1085. A qui j'ai longtems mené
paistre
Ses brebis et les y gardoye.
Par mon serment, je regardoye
Qu'il me paioit petitement...
Diray je tout ?

PATHELIN

Dea, seurement.

1090. A son conseil doit on tout dire.

LE BERGIER

Il est vray et verité, sire,
Que je les y ai assommées.
Tant que plusieurs se sont pasmées
Maintesfois se sont cheues mortes,

1095. Tant fussent els saines et fortes.

Et puis je luy faisoye entendre,
Affin qu'il ne m'en peust reprendre,
Qu'ilz mouroyent de la clavelée.

« Ha ! fait il, ne soit plus meslee

1100. Avec les aultres, gette la ! »

« Voulentiers », fais je. Mais cela

Se faisoit par une aultre voye.

Car, par Saint Jehan, je les mangeoye

Qui savoye bien la maladie.

1105. Que voulez vous que je vous
die ?

J'ay cecy tant continue,

J'en ay assommé et tué

Tant qu'il s'en est bien apperceu.

Et quant il s'est trouvé deceu,

1110. M'aist Dieux, il m'a fait espier,

Car on les oyt bien hault crier,

Entendez vous, quant on le fait.

Or ay je esté prins sur le fait.

Je ne le puis jamais nyer.

1115. Si vous voudroye bien prier

(Pour du mien, j'ay asses finance)

Que nous deux luy baillons l'avance.

Je sçay bien qu'il ha bonne cause ;

Mais vous trouverez bien tel clause,

1120. Se voulez, qu'il l'aura mauvaise.

PATHELIN

Par ta foy, seras tu bien aise.

Que donras tu, se je renverse

Le droit de la partie adverse

Et se l'en t'en envoie assoulz ?

LE BERGIER

1125. Je ne vous payeray point en sou

Mais en bel or a la couronne.

PATHELIN

Donc auras tu la cause bonne

Et fust elle la moitié pire.

Tant mieulx vault et plustost l'empire,

1130. Quant je vueil mon sens

applicquer ;

Que tu me orras bien desclicquer,

Quant il aura fait sa demande !

Or vien ca et je te demande,

Par le saint sang bieu precieux,

1135. (Tu es asses malicieux

Pour entendre bien la cautelle)

Comment esse que l'en t'appelle ?

LE BERGIER

Par Saint Mor, Thibault l'Aignelet.

PATHELIN

L'Aignelet ? Maint aigneau de let
1140. Luy as cabassé, à ton maistre.

LE BERGIER

Par mon serment, il peult bien estre
Que j'en ay mangié plus de trente
En trois ans.

PATHELIN

Ce sont dix de rente
Pour tes dez et pour ta chandelle.
1145. Je croy que luy baillera belle
Penses tu qu'il puisse trouver
Sur piez, ses fais par qui prouver ?
C'est le chief de la plaiderie.

LE BERGIER

Prouver ? Sire, Sainte Marie,
1150. Par tous les saintz de Paradis,
Pour ung il en trouvera dix,
Qui contre moy deposeront.

PATHELIN

C'est ung cas qui fort desront
Ton fait. Vecy que je pensoye :
1155. Je ne faindray point que je soye
Des tiens ne que je te veisse oncques.

LE BERGIER

Non ferez, Dieux !

PATHELIN

Non. Rien quelconques !
Mais vecy qu'il esconviendra :
Se tu parles, on te prendra,
1160. Coup a coup, aux posicions ;
Et, en telz cas, confessions
Sont si tres prejudiciables
Et nuysent tant, que ce sont dyables !
Pour ce, vecy que tu feras !
1165. Ja tost quant on t'appellera
Pour comparoir en jugement,
Tu ne respondras nullement
Fors « bee », pour rien que l'en te die ;
Et s'il avient qu'on te mauldie,
1170. En disant : « He cornard puant,
Dieu vous mette en mal an, truant !
Vous mocquez vous de la justice ? »
Dy « bee ». « Ha ! feray je, il est nice
Il cuide parler a ses bestes. »
1175. Mais s'ilz devoient rompre leurs
testes,
Que aultre mot n'ysses de ta bouche.
Garde t'en bien !

LE BERGIER

Le fait me touche.
Je m'en garderay vrayement
Et le fetay bien proprement,
1180. Je le vous promet et afferme.

PATHELIN

Or t'en garde ; tiens t'y bien ferme.
A moy mesme, pour quelque chose
Que je te die ne propose,
Si ne respondz point autrement.

LE BERGIER

1185. Moy ? nenny, par mon

sacrement !
Dittes hardiement que je afolle,
Se je dy huy aultre parolle
A vous n'a quelque aultre personne,
Pour quelque mot que l'en me sonne,
1190. Fors « bee », que vous m'avez
apriens.

PATHELIN

Par Saint Jehan, ainsi sera prins
Ton adversaire par la moe.
Mais aussi ais que je me loe.
Quant ce sera fait, de ta paye.

LE BERGIER

1195. Monseigneur, se je ne vous paye
A vostre mot, ne me croiez
Jamais. Mais je vous pry, voiez
Diligamment a ma besogne.

PATHELIN

Par Nostre Dame de Boulongne,
1200. Je tien que le juge est assis,
Car il se siet tous jours a six
Heures illec ou environ.
Or vien apres moy ; nous n'iron
Nous deux ensemble pas en voye.

LE BERGIER

1205. C'est bien dit, affin qu'on ne
voye
Que vous soyez mon advocat.

PATHELIN

Nostre Dame, moquin moquant
Se tu ne payes largement !

LE BERGIER

Dieux ! a vostre mot vraiment,
1210. Monseigneur, et n'en faictes
doubts.

PATHELIN

He ! dea, s'il ne pleut, il degoute ;
Au moins auray je une espinoche.
J'auray de luy, s'il chet en coche,
Ung escu ou deux, pour ma paine.
1215. Sire, Dieu vous doit bonne
estraise
Et ce que vostre cueur desire !

LE JUGE

Vous soyez le bien venu, sire !
Or vous couvrez. Sà, prenez place.

PATHELIN

Dea, je suis bien, sauf vostre grace,
1220. Je suis ycy plus a delivre.

LE JUGE

S'il y a riens, qu'on se delivre
Tantost, affin que je me lieve.

LE DRAPPIER

Men advocat vient qui achieve
Ung peu de chose qu'il faisait,
1225. Monseigneur, et, si vous plaisoit,
Vous ferjez bien de l'atendre.

LE JUGE

He ! dea, j'ay ailleurs a entendre.
Se vostre partie est presente.

Delivrez vous, sans plus d'atente.
Et n'estes vous pas demandeur ?

LE DRAPPIER

Si suis.

LE JUGE

Où est le deffendeur ?
Est il cy present en personne ?

LE DRAPPIER

Oüy, veez le là qui ne sonne
Mot. Mais Dieu scet ce qu'il en pense !

LE JUGE

1235. Puis que vous estes en presence
Vous deux, faictes votre demande.

LE DRAPPIER

Vecy doncques que luy demande,
Monseigneur : Il est verité
Que, pour Dieu et en charité,
1240. Je l'ay nourry en son enfance ;
Et quant je vi qu'il eust puissance
D'aler aux champs - pour abregier -
Je le fis estre mon bergier
Et le mis a garder mes bestes.
1245. Mais, aussi vray comme vous
estes
Là assis, monseigneur le juge,
Il en a fait ung tel deluge,
De brebis et de mes moutons.
Que sans faulte...

LE JUGE

Or escoutons :

1250. Estoit il point vostre aloué ?

PATHELIN

Voire, car s'il s'estoit joué
A le tenir sans alouer...

LE DRAPPIER

Je puisse Dieu desavouer,
Se ce n'estes vous, vous sans faulte.

LE JUGE

1255. Comment vous tenez la main
haulte ?
A'vous mal aux dens, maistre Pierre ?

PATHELIN

Oüy, elles me font tel guerre
Qu'oncques mais ne senty tel raige.
Je n'ose lever le visaige.
1260. Pour Dieu, faictes le proceder.

LE JUGE

Avant, achevez de plaider.
Sus. concluez apertement.

LE DRAPPIER

C'est il, sans aultre, vrayement !
Par la croix ou Dieu s'estendy,
1265. C'est a vous a qui je vendi
Six aulnes de drap, maistre Pierre,

LE JUGE

Qu'esse qu'il dit, de drap ?

PATHELIN

Il erre.
Il cuide à son propos venir
Et il n'y scet plus advenir,
1270. Pour ce qu'il ne l'a pas aprins.

LE DRAPPIER

Pendu soye, se autre l'a prins
Mon drap, par la sangiante gorge !

PATHELIN

Comment le meschant homme forge
De loing pour fournir son libelle !
1275. Il veult dire (est il bien rebelle !)
Que son bergier avoit vendu
La laine, je l'ay entendu,
Dont fut fait le drap de ma robe,
Comme s'il dist qu'il le desrobe
1280. Et qu'il luy a emblé la laine
De ses brebis.

LE DRAPPIER

Male sepmaine
M'envoye Dieu, se vous ne l'avez !

LE JUGE

Paix ! par le dyable, vous bavez.
Et ne savez vous revenir
1285. A vostre propos, sans tenir
La court de telle baverie ?

PATHELIN

Je sens mal et fault que je rie.
Il est desjà si empressé
Qu'il ne sçait ou il a laissé ;
1290. Il fault que nous luy reboutons.

LE JUGE

Sus, revenons à ces moutons !
Qu'en fut il ?

LE DRAPPIER

Il en print six aulnes
De neuf frans.

LE JUGE

Sommes nous bec jaunes ?
Ou cornards ? Où cuidez vous estre ?

PATHELIN

1295. Par le sang bieu, il vous fait
paistre.
Qu'est il bon homme par sa mine !
Mais je loe qu'on examine
Ung bien peu sa partie adverse.

LE JUGE

Vous dittes bieu ; il le converse.
1300. Il ne peult qu'il ne le
connoisse.
Vien cà, dy.

LE BERGIER

Bee.

LE JUGE

Yecy angoisse.
Quel « bee » esse cy ? Suis je chievre ?
Parle a moy.

LE BERGIER

Bee.

LE JUGE

Sanglante fievre
Te doint Dieu, et te mocques tu ?

PATHELIN

1305. Croiez qu'il est fol ou testu
Ou qu'il cuide estre entre ses bestes.

LE DRAPPIER

Or regnie je bieu, se vous n'estes
Celluy, sans aultre, qui l'avez
Eu, mon drap, ha ! vous ne sçavez,
1310. Monseigneur, par quelle malice.

LE JUGE

Et taisiez vous ! Estes vous nice ?
Laissez en paix ceste assessoire
Et venons au principal.

LE DRAPPIER

Voire,
Monseigneur, mais le cas me touche ;
1315. Toutesfois, par ma foy, ma
bouche
Meshuy ung seul mot n'en dira.
(Une aultre fois il en ira
Ainsi qu'il en pourra aler.
Il le me convient avaler
1320. Sans mascher.)...Or cà, je
disoye,
A mon propos, comment j'avoye
Baillé six aulnes... doy je dire
Mes brebis...je vous en pry, sire,
Pardonnez moy...ce gentil maistre...
1325. Mon bergier, quant il devoit
estre
Aux champs...il me dist que j'auroye
Six escus d'or quant je vendroye...

Di je, depuis trois ans en cà
Mon bergier m'en convenença
1330. Que loyaulment me garderoit
Mes brebis et ne m'y feroit
Ne dommaige ne villennie...

Et puis maintenant il me nye
Et drap et argent plainement !

1335. Ha ! Maistre Pierre, vrayement,
Ce ribault cy m'embroit les laines
De mes bestes et toutes saines
Les faisoit mourir et perir
Par les assommer et ferir

1340. De gros bastons sur la
cervelle...
Quant mon drap fut soubz son esselle,
Il se mist au chemin grant erre
Et me dist que je alasse querre
Six escus d'or en sa maison.

LE JUGE

1345. Il n'y a rime ne raison
En tout quant que vous rafardez.
Qu'esse cy ? Vous entrelardez
Puis d'ung puis d'aultre. Somme toute,
Par le sang bieu, je n'y voy goutte.
1350. Il brouille de drap et babille.
Puis de brebis, au coup la quille.
Chose qu'il die ne s'entretient.

PATHELIN

Or je m'en fais fort qu'il retient
Au povre bergier son salaire.

LE DRAPPIER

1355. Par Dieu, vous en peussiez bien
taire,
Mon drap, aussi vray que la messe,
(Je sçay mieulx où le bas me blesse
Que vous ne ung aultre ne sçavez)

Par la teste Dieu, vous l'avez !

LE JUGE

1360. Qu'esse qu'il a ?

LE DRAPPIER

Rien, monseigneur !
Par mon serment, c'est le grigneur
Trompeur. Ho ! la, je m'en tairay,
Se je puis, et n'en parleray
Meshuy, pour chose qu'il adviengne.

LE JUGE

1365. Et non ! mais qu'il vous en
souviengne.
Or concluez appertement.

PATHELIN

Ce bergier ne peult aultrement
Respondre aux faitz que l'en prepose,
S'il n'a du conseil ; et il n'ose
1370. Ou il ne scet en demander.
Si vous plaisoit moy commander,
Que je fusse a luy, je y seroye.

LE JUGE

Avecques luy je cuideroye
Que ce fust trestoute froidure.
1375. C'est peu d'aquest.

PATHELIN

Moy je vous jure
Qu'aussi n'en vueil je rien avoir.
Pour Dieu soit ! Or je vois savoir
Au povret, qu'il me vouldra dire,
Et s'il me sçaura point instuire

1380. Pour respondre aux faitz de
partie.
Il auroit dure departie
De ce, qui ne le secourroit.
Vien ca, mon amy, qui pourroit
Trouver...entens.

LE BERGIER

Bee.

PATHELIN

Quel bee, dea ?
1385. Par le saint sang que Dieu rea,
Es tu fol ? Dy moy ton affaire.

LE BERGIER

Bee.

PATHELIN

Quel « bee » ? oys tu tes brebis braire ?
C'est pour ton profit : entendz y.

LE BERGIER

Bee.

PATHELIN

Et dy oüy ou nenny.
1390. (C'est bien fait, dy, tousjours.
Feras ?)

LE BERGIER

Bee.

PATHELIN

Plus hault ou tu t'en trouveras
En grant despens et je m'en doubte.

LE BERGIER

Bee.

PATHELIN

Or est il plus fol, qui boute
Tel fol naturel en proces !
1395. Ha ! sire, renvoiez l'à ses
Brebis, il est fol de nature.

LE DRAPPIER

Est il fol ? Saint Sauveur d'Esture,
Il est plus saige que vous n'estes.

PATHELIN

Envoiez le garder ses bestes,
1400. Sans jour, que jamais ne
retourne.
Que maudit soit il qui ajourne
Telz folz ne ne fait ajourner.

LE DRAPPIER

Et l'en fera l'en retourner,
Avant que je puisse estre ouy ?

LE JUGE

1405. M'aist Dieu, puisqu'il est fol,
oüy.
Pour quoy ne fera ?

LE DRAPPIER

He ! dea, sire,
Au mains laissez moy avant dire
Et faire mes conclusions.
Ce ne sont pas abusions
1410. Que je vous dy ne mocqueries.

LE JUGE

Ce sont toutes tribouilleries
Que de plaider a folz ne a folles.
Escoutez a mains de parolles.
La court n'en sera plus tenue.

LE DRAPPIER

1415. S'en yront ilz sans retenue
De plus revenir ?

LE JUGE

Et quoy doncques ?

PATHELIN

Revenir ? Vous ne veistes oncques
Plus fol. N'en faites neant response ;
Et cil ne vault pas mieulx une once.
1420. Tous deux sont folz et sans
cervelle.
Par Sainte Marie la belle,
Eulx deux n'en ont pas ung quarat.

LE DRAPPIER

Vous l'emportastes par barat
Mon drap, sans payer, maistre Pierre.
1425. Par la char bieu, moy las ! Saint
Pierre,
Ce ne fut pas fait de preudomme

PATHELIN

Or je regnie Saint Pierre de Romme,
S'il n'est fin fol, ou il afolle.

LE DRAPPIER

Je vous congnois à la parolle
1430. Et à la robe et au visaige.
Je ne suis pas fol, je suis saige,
Pour congnoistre qui bien me fait.
Je vous compteray tout le fait,
Monseigneur, par ma conscience !

PATHELIN

1435. Hee ! sire, imposez leur silence.
N'a'vous honte de tant debatre
A ce bergier pour trois ou quatre
Vielz brebailles ou moutons
Qui ne valent pas deux boutons.
1440. Il en fait plus grant kyrielle...

LE DRAPPIER

Quelz moutons ? c'est une vielle !
C'est a vous mesme que je parle
Et vous me le rendrez par le
Dieu qui vout a Noel estre né !

LE JUGE

1445. Vez vous ! Suis je bien assené ?
Il ne cessera huy de braire.

LE DRAPPIER

Je luy demand...

PATHELIN

Faites le taire !
Et ! par Dieu, c'est trop flageollé.

1450. Prenons qu'il en ait affolé
six ou sept, ou une douzaine,
et mangez, en sanglante estraine :
vous en estes bien meshaigné !
vous avez plus que tant gaigné
1455. au temps qu'il les vous a gardez.

LE DRAPPIER

Regardez, sire, regardez !
je luy parle de drapperie,
et il respond de bergerie !
Six aulnes de drap, ou sont elles,
1460. que vous mistes soubz vos
esselles ?
Pensez vous point de les me rendre ?

PATHELIN

Ha ! sire, le ferez vous pendre
pour six ou sept bestes a laine ?
Au mains, reprenez vostre alaine ;
1465. Ne soyez pas si rigoureux
au povre bergier douloureux,
qui est aussi nu comme ung ver !

LE DRAPPIER

C'est tres bien retourné le ver !
Le dyable me fist bien vendeur
De drap a ung tel entendre.
1470. Dea, monseigneur, je luy
demande...

LE JUGE

Je l'assoulz de vostre demande
Et vous deffendz le proceder.
C'est ung bel honneur de plaider
A ung fol ! Va t'en à tes bestes !

LE BERGIER

1475. Bee.

LE JUGE

Vous monstrez bien qui vous estes,
Sire, par le sang Nostre Dame !

LE DRAPPIER

He ! dea, monseigneur, bon gré
m'ame,
Je luy vueil...

PATHELIN

S'en pourroit il taire ?

LE DRAPPIER

Et c'est a vous que j'ay affaire.
1480. Vous m'avez trompé fausement
Et emporté furtivement
Mon drap, par vostre beau langaige.

PATHELIN

Ho ! j'en appelle en mon couraige
Et vous louez bien, monseigneur...

LE DRAPPIER

1485. M'aist Dieu, vous estes le
grigneur
Trompeur, monseigneur, que je die.

LE JUGE

C'est une droicte cornardie
Que de vous deux ; ce n'est que noise.
M'aist Dieu, je loe que m'en voise.

1490. Va t'en, mon amy, ne retourne
Jamais pour sergent qui t'ajourne.
La court t'assoult, entens tu bien ?

PATHELIN

Dy grant merci.

LE BERGIER

Bee.

LE JUGE

Dis je bien ?
Va t'en ! ne te chault ?... autant vaille !

LE DRAPPIER

1495. Mais esse raison qu'il s'en aille
Ainsi ?

LE JUGE

Ay ! j'ay affaire ailleurs.
Vous estes par trop grant railleur
Vous ne m'y ferez plus tenir.
Je m'en vois. Voulez vous venir
1500. Souper avec moy, maistre
Pierre ?

PATHELIN

Je ne puis.

LE DRAPPIER

Ha ! qu'es tu fort lierre.
Dictes, seray je point payé ?

PATHELIN

De quoy ? Estes vous desvoyé ?
Mais qui cuidez vous que je soye ?
1505. Par le sang [bieu], de moy
pensoye
Pour qui c'est que vous me prenez.

LE DRAPPIER

Bee ! dea.

PATHELIN

Beau sire, or vous tenez.
Je vous diray, sans plus attendre,
Pour qui vous me cuidez prendre.
1510. Est ce point pour Esservellé ?
Voy ! nennin, il n'est point pelé,
Comme je suis, dessus la teste.

LE DRAPPIER

Me voulez vous tenir pour beste ?
C'estes vous en propre personne,
1515. Vous de vous. Vostre voix le
sonne
Et ne le croiez aultrement.

PATHELIN

Moy de moy ? Non suis vraiment !
Ostez en vostre opinion.
Seroit ce point Jehan de Noyon ?
1520. Il me ressemble de corsaiige.

LE DRAPPIER

He, deable, il n'a pas le visaige
Atnsi potatif ne si fade.
Ne vous laissé je pas malade
Orains dedens vostre maison?

PATHELIN

1525. Ha ! que vecy bonne raison !
Malade ? et de quel maladie ?
Confessez vostre cornardie,
Maintenant est elle bien clere.

LE DRAPPIER

C'estes vous, ou regnie Saint Pierre,
1530. Vous, sans aultre, je le sçay bien
Pour tout vray.

PATHELIN

Or n'en croyez rien,
Car certes ce ne suis je mie.
De vous oncq aulne ne demie
Ne prins, je n'ay pas le los tel.

LE DRAPPIER

1535. Ha ! Je vois veoir en vostre
hostel,
Par le sang bieu, se vous y estes.
Nous n'en debatrons plus nos testes
Ycy, se je vous treuve là.

PATHELIN

Par nostre Dame, c'est cela :
1540. Par ce point le sçarez vous
bien.
Dy, Aignelet.

LE BERGIER

Bee.

PATHELIN

Vien çà, vien.

Ta besongne est elle bien faicte ?

LE BERGIER

Bee.

PATHELIN

Ta partie est retraicte.

Ne dy plus bee, il n'y a force.

1545. Luy ay je bailié : belle estorse ?

T'ay je point conseillé à point ?

LE BERGIER

Bee.

PATHELIN

He ! dea, on ne te orra point,
Parle hardiement, ne te chaille.

LE BERGIER

Bee.

PATHELIN

Il est temps que je m'en aille.

1550. Paye moy !

LE BERGIER

Bee.

PATHELIN

A dire voir

Tu as tres bien fait ton devoir,

Et aussi bonne contenance.

Ce qui luy a bailie l'avance,

C'est que tu t'es tenu de rire.

LE BERGIER

1555. Bee.

PATHELIN

Quel bee ? Il ne le fault plus dire.

Paye moi bien et doucement.

LE BERGIER

Bee.

PATHELIN

Quel bee ? Parle saigement

Et me paye, si m'en yray.

LE BERGIER

Bee.

PATHELIN

Scez tu quoy je te diray ?

1560. Je te pry, sans plus m'abaier,

Que tu penses de moi payer.

Je ne vueil plus de ta baierie.

Paye tost.

LE BERGIER

Bee.

PATHELIN

C'est moquerie.

Est ce quant que tu en feras ?

1565. Par mon serment, tu me paieras,

Entens tu, se tu ne t'en voiles.

Sà, argent.

LE BERGIER

Bee.

PATHELIN

Tu te rigolles ?
Comment ? N'en auray je aultre
chose ?

LE BERGIER

Bee.

PATHELIN

Tu fais le rimeur en prose.
1570. Et à qui vendz tu tes coquilles ?
Scez tu qu'il est ? Ne me babilles
Meshuy de ton « bee » et me paye.

LE BERGIER

Bee.

PATHELIN

N'en auray je aultre monnoye ?
A qui te cuides tu jouer ?
1575. Je me devoie tant louer
De toy, or fais que je m'en loe.

LE BERGIER

Bee.

PATHELIN

Me fais tu mengier de l'oe.
Maugré bieu, ay je tant vesou

Que ung bergier, ung mouton vestu,
1580. Ung villain paillart me rigolle ?

LE BERGIER

Bee.

PATHELIN

N'en auray je aultre parolle ?
Se tu le fais pour toy esbatre,
Dy le, ne m'en fay plus debatre.
Vien t'en souper a ma maison.

LE BERGIER

1585. Bee.

PATHELIN

Par Saint Jehan, tu as raison :
Les oisons mainnent les oes paistre.
Or cuidoye estre sur tous maistre
Des trompeurs, d'icy et d'ailleurs,
Des fort coureux et des bailleurs
1590. De paroles en payement
A rendre au jour du Jugement,
Et ung bergier des champs me passe !
Par saint Jaques, se je trouvasse
Ung sergent, je te fisse prendre.

LE BERGIER

1595. Bee.

PATHELIN

Heu ! bee ! L'en me puisse pendre,
Se je ne vois faire venir
Ung bon sergent ! Mesadvenir
Luy puisse il, s'il ne t'enprisonne !

LE BERGIER

S'il me treuve, je luy pardonne !

Explicit.